



basic education

Department:
Basic Education
REPUBLIC OF SOUTH AFRICA

NATIONAL SENIOR CERTIFICATE

LIBANGA 12

SISWATI LULWIMI LWASEKHAYA (HL)

LIPHEPHA LESIBILI (P2)

INDLOVULENKHULU/MASHI 2013

EMAMAKI: 80

SIKHATSI: 2½ ema-awa

Leliphepha linemakhasi la-22.

TICONDZISO KULABAHLOLWAKO

1. Fundza lelikhasi ngembikwekutsi ucale kuphendvula imibuto.
2. Ungalifundzi lonkhe liphepha lemibuto. Buka lokucuketfwe ekhasini lelilandzelako bese ubeka luphawu kulowo nalowo mbuto lobutwe ngetincwadzi lotifundze lonyaka. Emva kwaloko, fundza leyo mibuto lenetimpawu kuphela bese ukhetsa leyo lofuna kuphendvula yona.

3. Liphepha lemibuto licuketse TIGABA LETINTSATFU:

SIGABA A: Tinkondlo (30)

SIGABA B: Inoveli (25)

SIGABA C: Umdlao (25)

4. ISIHLANU IMIBUTO lefanele uyiphendvule seyiyonkhe: ESIGABENI A imibuto mitsatfu (3), ESIGABENI B munye (1), ESIGABENI C munye (1) ngalendlela:

SIGABA A: TINKONDLO

Phendvula imibuto ibe mibili yeTINKONDLO LETIFUNDVWE EKLASINI.
Phendvula umbuto munye ETINKONDLWENI LETINGAKAFUNDVWA EKLASINI.

SIGABA B: INOVELI

Phendvula umbuto ube munye.

SIGABA C: UMDLALO

Phendvula umbuto ube munye.

5. KUKHETFWA KWETIMPHENDVULO TESIGABA B (INOVELI) NESIGABA C (UMDLALO)

➤ Phendvula KUPHELA imibuto yenoveli loyifundzile kanye nemdlalo lowufundzile.

➤ Phendvula UMBUTO MUNYE WENZABAMBHALO KANYE NAMUNYE UMBUTO EMIBUTWENI LEMIFISHA. Uma ukhetse kuphendvula umbuto wenzabambhalo ESIGABENI B, uphokelekile kutsi uphendvule imibuto lemifisha ESIGABENI C. Uma uphendvule imibuto lemifisha ESIGABENI B, uphokelekile kutsi uphendvule umbuto wenzabambhalo ESIGABENI C.

Sebentisa luhlu lwekutikhumbuta kute usitakale.

6. BUDZE BETIMPHENDVULO

➤ Imibuto yenzabambhalo etinkondlweni kufanele iphendvulwe ngemagama la-190–240.

➤ Indzabambhalo yenoveli nemdlalo kufanele iphendvulwe ngemagama la-340–390.

➤ Budze betimphendvulo temibuto lemifisha bufanele buhambisane nelinani lemamaki labekiwe. Labahlolwako kufanele banganhlanhlatsi.

7. Fundzisisa kahle ticondziso letisekucaleni kwaleso naleso sigaba.
8. Tinombolo tetimphendvulo atihambisane naleto temibuto njengobe tinjalo ephepheni lemibuto.
9. Cala LESO NALESO sigaba ekhasini LELISHA.
10. Bhala ngesandla lesibonakalako nalesifundzekako.
11. Siphakamiso sekulawulwa kwesikhatsi:
SIGABA A: Lokungenani emaminitsi la-40.
SIGABA B: Lokungenani emaminitsi la-55.
SIGABA C: Lokungenani emaminitsi la-55.

LIKHASI LALOKUCUKETFWE

Lelikhasi litawusita bahlolwa kutsi bakwati kukhetsa imibuto labafuna kuyiphendvula ngaphandle kwekufundza lonkhe liphepha lemibuto.

SIGABA A: TINKONDLO			
Tinkondlo Letimisiwe: Phendvula nobe nguYIPHI imibuto LEMIBILI.			
INOMBOLO YEMBUTO	UMBUTO	EMAMAKI	LIKHASI
1. 'Kuhle Ketfu'	Umbuto loyindzabambhalo	10	6
NOBE			
2. 'Mvunulo Yemhlaba'	Imibuto lemifisha	10	7
NOBE			
3. 'Ntfombi Yetimanga'	Imibuto lemifisha	10	8
NOBE			
4. 'Kants' Uphumula Nini?'	Imibuto lemifisha	10	9
NA			
Inkondlo lengakafundwa eklasini: Phendvula nobe ngumuphi umbuto ube MUNYE.			
5. 'Ngingenise'	Umbuto loyindzabambhalo	10	11
NOBE			
6. 'Ngingenise'	Imibuto lemifisha	10	12
SIGABA B: INOVELI			
Phendvula umbuto MUNYE.			
7. <i>Liphume Nebovu</i>	Umbuto loyindzabambhalo	25	14
NOBE			
8. <i>Liphume Nebovu</i>	Imibuto lemifisha	25	14
NOBE			
9. <i>Kubamba Letingelako</i>	Umbuto loyindzabambhalo	25	15
NOBE			
10. <i>Kubamba Letingelako</i>	Imibuto lemifisha	25	16
SIGABA C: UMDLALO			
Phendvula umbuto MUNYE.			
11. <i>Kwahlwa Emini</i>	Umbuto loyindzabambhalo	25	18
NOBE			
12. <i>Kwahlwa Emini</i>	Imibuto lemifisha	25	18
NOBE			
13. <i>Umvuzo</i>	Umbuto loyindzabambhalo	25	20
NOBE			
14. <i>Umvuzo</i>	Imibuto lemifisha	25	20

CAPHELA: Esigabeni B na-C, phendvula YINYE INDZABAMBHALO naMUNYE umbuto WEMIBUTO LEMIFISHA.

LUHLA LWEKUTIKHUMBUTA

Lelikhasi litawusita bahlolwa ekukhetseni imibuto labafuna kuyiphendvula ngaphandle kwekufundza lonkhe leliphepha lemibuto.

	TINOMBOLO TEMIBUTO	LINANI LEMIBUTO LEPHENDVULWAKO	TICK ✓
A: Tinkondlo (Tinkondlo letifundvwe eklasini)	1–4	2	
A: Tinkondlo (Inkondlo lengakafundvwa eklasini)	5–6	1	
B: Inoveli (Indzabambhalo nobe imibuto lemifisha)	7–10	1	
C: Umdlalo (Indzabambhalo nobe imibuto lemifisha)	11–14	1	
CAPHELA: Esigabeni B na-C, phendvula YINYE INDZABAMBHALO NAMUNYE umbuto WEMIBUTO LEMIFISHA.			

SIGABA A: TINKONDLO**TINKONDLO LETIFUNDVWE EKLASINI**

Khetsa tinkondlo tibe TIMBILI kuleti letilandzelako uphendvule ngato imibuto letawulandzela.

UMBUTO 1: UMBUTO LOYINDZABAMBHALO

Fundza lenkondlo lelandzelako bese uphendvula imibuto letawulandzela.

KUHLE KETFU! – OA Bhiya

- | | |
|----|--|
| 1 | Kusemtsimbeni lomangalisako, |
| 2 | Kusemgidvweni lowesabekako; |
| 3 | Bapheleketeli bamakoti banyukubele, |
| 4 | Buso betibukeli buncumile, |
| 5 | Bahlabelela ungatsi bakhatsese, |
| 6 | Makoti ucambalele tfwi! |
| 7 | Lomshad' uyangimangalisa! |
| 8 | Umlobokati wembets' iveyili yeliphulango, |
| 9 | Umyeni wembetse letimnyama, |
| 10 | Bahlabeleli bambetse inyufomu lemnyama; |
| 11 | Buso babo buphaphatsekile, |
| 12 | Imiphefumulo yab'ikhatsatekile. |
| 13 | Talukat' atililiteli; |
| 14 | Emajah' awaphoseki, |
| 15 | Tintfomb' atigidz' indlamu, |
| 16 | Bantfwana beme' ekudzeni, |
| 17 | Bamunya tiffuph' emlonyeni, |
| 18 | Kungabe bayawulala badleni? |
| 19 | Iwil' insika yelikhaya. |
| 20 | Sicumbi setivakashi siyashuca, |
| 21 | Libandla lebafundisi liyahuba; |
| 22 | Bayolim' ensimini lengafulwa. |
| 23 | Likhaba lalensimu liyabola; |
| 24 | Likhaba lalensimu alibonwa. |
| 25 | Umbhishobh' ubusis' umlobokati, |
| 26 | Umbhishobh' ubhek' emculwini; |
| 27 | 'Lutful' elutfulin' umphefumulo kuMnikati' |
| 28 | Liyakhemetel' etibukelini, |
| 29 | Iyan' invul yetinsizi; |
| 30 | Umtsimba wonkh' uhluneme, |
| 31 | Umlobokati usele weneme. |

- | | |
|----|-----------------------------------|
| 32 | Insimu bayifulatsela ngenjabulo, |
| 33 | Tinini tichawulana ngenjabulo; |
| 34 | Tibukeli titfwayitela ngenjabulo. |
| 35 | Sebayawusala bamkhumbula; |
| 36 | Sebayawusala betintsandzane |
| 37 | Batsandzane ngebuntsandzane. |

Bhala indzatjanambhalo lapho uveta khona kuhambelana kwemcondvo lojulile kulenkondlo lengenhla naloko lokwenteka etimphilweni talomuhla ngetimo letifana nalesi lesikulen kondlo.

Budze bemphendvulo yakho abube ngemagama langabi ngaphasi kwala-190 kodvwa angabi ngetulu kwala-240.

[10]

NOBE**UMBUTO 2: IMIBUTO LEMIFISHA**

Fundza lenkondlo lelandzelako bese uphendvula imibuto letawulandzela.

MVUNULO YEMHLABA – JJ Thwala

- | | |
|----|-------------------------------------|
| 1 | Umuhle mvunulo yemhlaba, |
| 2 | Umuhle kuleto tindzawo |
| 3 | Lewuhlobise kuto ngentfobeko, |
| 4 | Buhle bakho buyababateka, |
| 5 | Buhle bakho buyamangalisa, |
| 6 | Mvunulo yetimangaliso. |
| 7 | Umuhle mvunulo yemhlaba, |
| 8 | Umuhle luhlongw' emakhondvosini |
| 9 | Umuhle likhiwan' etihlanjeni, |
| 10 | Umuhle nsikan' etigangeni, |
| 11 | Umuhle lutindz' etintsabeni, |
| 12 | Umuhle nhlan' emacentselweni. |
| 13 | Umuhle mvunulo yemhlaba, |
| 14 | Umuhle bewuyovunulani |
| 15 | Kube bewungekho mvunulo? |
| 16 | Uyihlobisil' imvelo |
| 17 | Ngebuhle bakho lobubabatekako, |
| 18 | Nangekuheha kwakho lokumangalisako. |
| 19 | Umuhle mvunulo yemhlaba, |
| 20 | Buhle bakho benanelwa |
| 21 | Tinyoni ngemaphimbophimbo |
| 22 | Kuncwincwita tincwincwi, |
| 23 | Kucocodza tincocodzi |
| 24 | Kuswesweta tinsweti. |

- 2.1 Ngemugca munye nika umcondvo losobala lowetfulwa ngulenkondlo. (1)
- 2.2 Hlobo luni lweluchumano loluvetwa yindzima yesibili kulenkondlo lengenhla? (1)
- 2.3 Chaza ngemusho munye kutsi ucondzeni sonkondlo nakatsi:
'Umuhle bewuyovunulani
Kube bewungekho mvunulo?' (1)
- 2.4 Bunkondlo buni lobuvetwa ngulemigca yenkondlo lelandzelako?
'Uyihlobisil' imvelo
Ngebuhle bakho lobubabatekako' (1)
- 2.5 Kulenkondlo sonkondlo usebentise lisu lebunkondlo lekugcizelela ngekuphindza umcondvo lotsite. Shano lelisu lasonkondlo bese unika sibonelo salelisu. (2)
- 2.6 Lokushiwo ngulenkondlo ngabe kubumbene kangakanani nengcikitsi yayo? Sekela imphendvulo yakho. (2)
- 2.7 Phawula ngemphumelelo yasonkondlo ekusebentiseni sifutamsindvo kulenkondlo lengenhla. (2)
- [10]**

NOBE

UMBUTO 3: IMIBUTO LEMIFISHA

Fundza lenkondlo lelandzelako bese uphendvula imibuto letawulandzela.

NTFOMBI YETIMANGA – SR Mdluli

- 1 Ababangaki labatiba buso bakho Ntfombi
- 2 Ababonwa labatsi uma bahlala bakufulatsele Ntfombi
- 3 Ngikhuluma ngawe ntsandvokati yaketfu.
- 4 Kuba kuvuka nje, embikwakho kuyahlalwa
- 5 Utikhinike ungakhatsali ungahhani
- 6 Temhlaba netemmango utikhipha ngeliphimbokati
- 7 Sotilwimilwimi ntsandvose wababe.
- 8 Khewane ucoca nawe ahlekelele
- 9 Likhehla liphula imphandla likhumbule
- 10 Likhumbula ebusheni kucine libunti
- 11 Litikhumbule lisayikhahlela yetinyawo
- 12 Somidlalodlalo ntfombi yesive.

- | | |
|----|---|
| 13 | Ungumatfunywa avume sibili |
| 14 | Ungucitsa situngu mbamba |
| 15 | Ungumantjilota longenamahloni nekuhleleka |
| 16 | Ungumatsengisa ngenkhani etindlini tebantfu |
| 17 | Ungumaphikelela wetimanga ntfombi yetimanga |
| 18 | Wakho umkhuhlane ukhuba linyenti. |
| 19 | Bothishela bona bavete lemhlatsi ngawe |
| 20 | Ngobe umsebenti wekhaya utawentiwa |
| 21 | Umkhuhlane ubabambele wena Sobambelela |
| 22 | Webafundzi. |

- 3.1 Ngemugca munye nika umcondvo lofihlakele lowetfulwa ngulenkondlo. (1)
- 3.2 Nika inchazelo yesisho lesisetjentiswe endzimeni 5. (1)
- 3.3 Bunkondlo buni lobuvetwa ngulomugca lolandzelako?
'Utikhinike ungakhatsali ungahhoni' (1)
- 3.4 Sonkondlo ucondze kutsini ngaleligama lelitsi 'kutiba' emgceci 1? (1)
- 3.5 Chaza kutsi ucondze kutsini sonkondlo ngaleligama lelidvvetjelwe kulomugca wenkondlo lolandzelako nakatsi:
'Sotilwimilwimi ntsandvose wababe.' (2)
- 3.6 Sinemba kangakanani lesihloko salenkondlo kuloku lokujulile lekholuma ngako. (2)
- 3.7 Ucabanga kutsi hloboluni lwetinhlelo letishiwo ngusonkondlo emgceci 8? Nika tibe timbili. (2)
- [10]**

NOBE**UMBUTO 4: IMIBUTO LEMIFISHA**

Fundza lenkondlo lelandzelako bese uphendvula imibuto letawulandzela.

KANTS' UPHUMULA NINI? – JJ Thwala

- | | |
|---|--------------------------------------|
| 1 | Uma ungahamb' uyagcumagcuma |
| 2 | Utfutsel' utsats' ubeke, |
| 3 | Ufise lok' ufise lokwa, |
| 4 | Wale lok' ufune lokwa, |
| 5 | Ngikuyise ngasemitfonjeni lepholile, |
| 6 | Ngihlale kulepholile imitfunti |
| 7 | Ngiphumule ... Wen' ushaye njalo, |
| 8 | Ubelelele ngesivinini sakho semihla; |
| 9 | Kants' uphumula nini? |

- 10 Ngiye ngijabule ngitsi
 11 Shona langa ngitewuphumula ...
 12 Uma ngidvonsa siphuku
 13 Ucala phasi ngemibalo yakho,
 14 Ucale kancan' ungikhumbute
 15 Lebekwentek' emini yalomuhla,
 16 Wendlul' ungicabangise tayitolo,
 17 Utsatseke ngematsemba netifiso takusasa;
 18 Kants' uphumula nini?
- 19 Ngilala ngikushiy' unoma,
 20 Ngitumeka solo wen' udidiyela,
 21 Uhamb' ungishiy' ube ngumcubashisi
 22 Emaven' enjabulo netinsizi,
 23 Lapho tifiso tikutfwala tikubeke khona,
 24 Ungishiye ngisiphalat' emaphusheni;
 25 Ungishiye ngilele ngentfokomalo;
 26 Kants' uphumula nini?
- 27 Buka sebakubonile bodokotela
 28 Kutsi laph' ukhuphuk' imicansa
 29 Wetfwel' imicabango netifiso,
 30 Udvons' elubikibikini lwendvumalo,
 31 Ugabadvul' imimango yetinsizi,
 32 Kuvakale nemoya sewushona phansi;
 33 Uva sebatsi kufanel' uphumule,
 34 Kants' uphumula nini?
- 35 Lebakwati ncono bats' ulibhikawozi,
 36 Kuwe kuhlum' ematsemba netifiso,
 37 Kuphekwe nelutsandvo luphuphume;
 38 Nalokubi batsi kuvela kuwe,
 39 Nentondvo nemavundvo kukuwe,
 40 Kungak' usigayo lesingaphumuli,
 41 Nasidziniwe ngulokuhle sigcakaza lokubi;
 42 Kantsi nasewuphumba kuthula nelucolo
 43 Utsats' ubeke taba tekudvudvuta
 44 Kungats' ulitiko lemhlatjelo wekuthula;
 45 Nome kunjalo kants' uphumula nini?

4.1 Ngekucabanga kwakho yini loku lokukhulunywa ngako lapha kulenkondlo?
 Nika kunye. (1)

4.2 Ngeligama linye, ungakuchaza utsi yini loku lokwenteka kulemigca yenkondlo
 lelandzelako?

'Utfutsel' utsats' ubeke,
 Ufise lok' ufise lokwa,
 Wale lok' ufune lokwa'

(1)

- 4.3 Bunkondlo buni lobuvelwa ngulamagama ladvwetjelwe kulemigca yenkondlo lelandzelako?
'Ngilala ngikushiy' unoma,
'Ngitumeka solo wen' udidiyela' (1)
- 4.4 Usuke entani umuntfu nangabe 'advonsa siphuku? (1)
- 4.5 Chaza umcondvo lofihlakele lowetfulwa yindzima 4. (2)
- 4.6 Phawula ngemoya lotfolakala kulenkondlo lengenhla bese wesekele imphendvulo yakho ngekucaphuna enkondlweni. (2)
- 4.7 Budlelwano buni lobuchazwa ngusonkondlo emgceni 19 na-20 ngekwetitfo temtimba? Chaza. (2)
- [10]**

NA

TINKONDLO LETINGAKAFUNDVWA EKLASINI

Phendvula MUNYE umbuto kulena lelandzelako.

UMBUTO 5: UMBUTO LOYINDZABAMBHALO

Fundza lenkondlo lelandzelako bese uphendvula imibuto letawulandzela.

NGINGENISE – LX Nkambule

- | | |
|----|---|
| 1 | Nwele tinyampunyampu tibusheleleti |
| 2 | Nyanyavu umenyetelisa iNyakatfo neNingizimu |
| 3 | Unyatsela basolute tintsamo, |
| 4 | Ukhanyis' umnyama unyamalale, |
| 5 | Unyenyeta bunye, unyenyeta bunandzi |
| 6 | Bunandzi lobunanatela lutsandvo. |
| 7 | Tihlatsi timsheleleti njengeteluswane, |
| 8 | Tihlatsi kwetintsambo tebhulalu, tigcwele, |
| 9 | Titsambile tigicik' umusa. |
| 10 | Ematinyo akho amhlophe njengesitfwatfwa, |
| 11 | Sitfwatfwa sembetfwe nguMdzimba, |
| 12 | Akuphunga uphetfuka bunandzi. |
| 13 | Nyosi yekuphila lephilisako, |
| 14 | Tfululela luju lwakho lolumnandzi |
| 15 | Loluconsako lolucokotsile, |
| 16 | Nyambisa imitsambo yami ngeneliswe |
| 17 | Ngome njengemlilo longesutsi ubaselwa |
| 18 | Ngophele ngekhatshi kwemagagasi entfokoto |
| 19 | Ngoba ngifa lutsandvo. |

- | | |
|----|---|
| 20 | Ntjweza, untjweze nami sitsandvwa |
| 21 | Njengemjiva wengubo yakho, |
| 22 | Ngidvonse njalo emva kwakho |
| 23 | Sengindiza ngenamile, |
| 24 | Ngite ngingene emasangweni akenu, |
| 25 | Sengihlobile ngihlome emagwalagwala akho. |
| 26 | Nkhanyeti yekusa, |
| 27 | Ngimeme kuleto timphiko, |
| 28 | Njengelivivane etimbalini, |
| 29 | Ngisuke, ngihlale, ngihlabelele |
| 30 | Ngishone, ngivokoshe, ngivumbuke |
| 31 | Ngebunandzi senginamatsele |
| 32 | Ngicamele nginambitsisisa lutsandvo. |

Bhala indzatjanambhalo lapho uveta khona umcondvo lojulile lowetfulwa ngulenkondlo lengenhla.

Budze bemphendvulo yakho abube ngemagama langabi ngaphasi kwala-190 kodvwa kungabi ngetulu kwala-240.

[10]

NOBE

UMBUTO 6: IMIBUTO LEMIFISHA

Fundza futsi lenkondlo lesembutweni 5 bese uphendvula imibuto letawundzela.

- 6.1 Sinongo sini lesi lesikulomugca wenkondlo lolandzelako?
'Ngophele ngekhatsi kwemagagasi entfokoto' (1)
- 6.2 Bunkondlo buni lobuvelwa ngulamagama ladvwetjelwe kulomugca wenkondlo lolandzelako?
'Ntjweza, untjweze nami sitsandvwa' (1)
- 6.3 Khokha imigca yenkondlo lenemvumelwanosigcino uyibhale phasi bese udvwebela lemumelwano. (1)
- 6.4 Hlobo luni lwebunkondlo loludalwa kusetjentiswa kwaletimphawu letikulomugca wenkondlo lolandzelako?
'Ngishone, ngivokoshe, ngivumbuke' (1)
- 6.5 Ngekubona kwakho, kukuphi lapho sonkondlo afuna kungeniswa khona? Chaza. (2)

6.6 Ngabe sonkondlo uwakhetse ngemphumelelo yini lamagama lakulomugca wenkondlo lolandzelako? Sekela imphendvulo yakho.

'Nkhanyeti yekusa'

(2)

6.7 Phawula ngelikhono lasonkondlo lekusebentisa kwakhe sifaniso lesisemgceci 7.

(2)
[10]

SAMBA SESIGABA A: 30

SIGABA B: INOVELI

Kulesigaba kunemanoveli lamabili. Wena-ke khetsa ibe YINYE loyifundze eklasini lonyaka uphendvule ngayo.

CAPHELA: Khetsa emkhatsini WENDZABAMBHALO NEMIBUTO LEMIFISHA kuleyo naleyo noveli loyifundzile. Kumele uphendvule nobe ngumuphi umbuto ube MUNYE *ngaleyo noveli loyifundzile*. Uma ukhetsa kuphendvula umbuto wenzabambhalo kulesigaba, uphokelelekile kutsi ESIGABENI C uphendvule imibuto lemifisha.

UMBUTO 7: UMBUTO LOYINDZABAMBHALO**LIPHUME NEBOVU – BB Malangwane**

Bhala indzabambhalo **NGESISUSA** sekucanjwa kwalenoveli kutsiwe, 'LIPHUME NEBOVU,' Indzabambhalo yakho ayesekelwe ngekucaphuna enovelini.

Indzabambhalo yakho ayibe nemagama langabi ngaphasi kwala-340 kodvwa angabi ngetulu kwala-390.

[25]**NOBE****UMBUTO 8: IMIBUTO LEMIFISHA****LIPHUME NEBOVU – BB Malangwane**

Fundza letheksthi leyincenye yenzaba bese uphendvula imibuto letawulandzela.

'Wasihlasela ekuseni kangaka Gagula ngabe soneni nebakitsi?' Kusho indvundvuma yemfati leyayitse bihli esitulweni lesasesifile nakusindvwa ngulomtfwalo. Sasitikhalela kabuhlungu lapho anyakata. Naloku ayinyandza nje lomuntfu kodvwa LaMagagula wamkhandza avimbetele sigamu semkhama wesinkhwa. Phela inkomishi yakhe nayo yayilinganiselwe sisu sakhe. Ngumkamfundisi Mahlalela-ke lowo. Nguyena mkhokheli waboLaMagagula.

'Sengitekuvalelisa make. Sengivele ngiyahamba,' asho setigcwele emehlo umntfwana waMagagula. Abone umkamfundisi kutsi kukhona lokungahambi kahle lapha kuLaMagagula. Akabange asacedza naleyo ndvundvuma yesinkhwa leyayisembikwakhe. Wasukuma wabita boLaDludlu naLaVilakati lokwakunguwona emakhosikati emthandazo labekasedvute.

'LaMagagula, kambe ngabe labadzala bese uke wabatisa nje ngalesinyatselo lose ufuna kusitsatsa? Sengisho phela nalabo basekhaya kini.'

'Njengobe babe namake sebabindza kadzeni nje, akusekho muntfu losanesikhatsi sekulalela tinkinga tami ekhaya kitsi. Yebo tinkhomo tami batidla labo labafanele, kodvwa kute nakuncane labangangisita ngako. Nami sengitibona ngingumtfwalo nasetihlotjeni tami. Loku kubangwa nakutsi kute nemasimu lesiwalimako lapha ekhaya. Khumalo phela akasati nekutsi siyadla yini lapha ekhaya. Ingani nangu umntfwana lengimmemile wamshiya anetinyanga letine esiswini.

[Emakhasi 49–50]

- 8.1 Umbhali walenoveleli usebentise liphi lisu lekuveta umkamfundisi Mahlalela kuletheksthi lengenhla, futsi umvete angumlingisi lonjani. Bhala libe linye kuphela. (2)
- 8.2 Humusha simo semoya kuletheksthi lengenhla usicatsanise nasinye lesinemoya lofana naso kuletigameko letisenovelini. (2)
- 8.3 LaMagagula abengasuye umuntfu lotsandza imphilo yebucwebecwebe kusukela ebuntfombini bakhe. Sekela lombono ngekucaphuna enovelini. (2)
- 8.4 Bhala tizatfu letimbili lebetenta Lushawulo angeti njalo ekhaya kutewuvusela umkakhe nebantfwabakhe. (2)
- 8.5 Bhala imitselela lemibili yaloku lokwentwa nguLushawulo emindenini yalomuhla leniphila nayo emimangweni yangakini. (2)
- 8.6 Lesigameko sekuboshwa kwaLushawulo ngekutfolakala atsengisa umtfunti wetinkhukhu siveta siphilimo ngemphilo yakhe? (2)
- 8.7 Tinkholelo tingakuhlisa loko lonako ngelite, ubuye utisole kamuva. Sekela lombono ngekubhekisa enovelini. (2)
- 8.8 Caphuna sigameko lesingakhishwa, sisuswe ngalokuphelele kulenoveleli kodvwa indzaba ichubeke ngaphandle kwekuphazamiseka ngenca yekutsi asitselelani emanti naletinye endzabeni yonkhe. (2)
- 8.9 Bhala sigameko sinye kulenoveleli lesiveta ludvweshu lwangekhatsi lube sobala, unike sizatfu sekutsi yini utsi ludvweshu lwangekhatsi. (2)
- 8.10 Ngekwakho kubona ngabe indzima yemasontfo ekwesekeleni imishado inalo yini ligalelo? Bhekisa imphendvulo yakho kuletheksthi lengenhla. (2)
- 8.11 Bafundzani bomake bemakhaya ngemphilo yaTintfombi kulenoveleli? Bhala kubili. (2)
- 8.12 Bhala sigameko lobona kutsi singena kahle ngaphasi kwesigaba sesakhiwo senoveleli, lesisicakacaka, uchaze kutsi usho ngani kusi sakha incenye yesicakacaka. (3)

[25]**NOBE****UMBUTO 9: UMBUTO LOYINDZABAMBHALO*****KUBAMBA LETINGELAKO* – DE Nkosi**

Bhala indzabambhalo **NGESISUSA** sekucanjwa kwalenoveleli kutsiwe, *KUBAMBA LETINGELAKO*. Indzabambhalo yakho ayesekelwe ngekucaphuna enovelini.

Indzabambhalo yakho ayibe nemagama langabi ngaphasi kwala-340 kodvwa angabi ngetulu kwala-390.

[25]**NOBE**

UMBUTO 10: IMIBUTO LEMIFISHA**KUBAMBA LETINGELAKO – DE Nkosi**

Fundza letheksthi lelandzelako bese uphendvula imibuto letawulandzela.

Wavalelisa kaTsabetse, wabamba lete ngayo Mphikeleli. Wafika ekhaya wababikela ngeluhambo lwakhe lwekuvakashela kaTsabetse. Luhambo lolwamphatsela injabulo nelusizi, kumangala nekwetfuka.

'Utsini-ke make ngeluhambo lwami loluya kaTsabetse?'

'Luhambo belugunyatwe nguNkulunkulu lolo babe.'

'Pho kwenteka esikhatsini lapho silindzele lukhetfo lwasosifundzave!'

'Ungetfuki babe. Kukhetfwa umuntfu lonetimpawu tebhohli. Umuntfu ukhetfwa ngemisebenti yakhe. Ngiko nje sive sakaNgungunyane sigcamisa imisebenti ngekutsi, 'mintiro iyavulavula.' Mani sibindzi babe.'

Batsi basakhuluma kungene emakhansela lamabili boNyoni naShongwe. Bafika selibalela kuletimphezi. 'Sitewukwatisa sihlobo setfu kutsi babe waMagumeni, likhehla lelinguTsabetse seliwufulatsela lomhlaba.'

'Hhayi! Tsabetse benginaye emini yasekuseni lamuhla. Sicocile naye lesidze sikhatsi. Timpawu tekukhula nje betibonakala, hhayi kugula.'

'Nguleto-ke tindzaba letibuhlungu sihlobo,' kusho Nyoni.

'Kufa lisela sibili. Angeke utsi umuntfu umgcine nini. Kuphela emaminithi lambalwa nehlukeno nemuntfu uve batsi akasekho emhlabeni. Uvele uphelelwe ngemandla ungati kutsi utawutsini ngobe kusuke sekucitseke ligula lelinemasi. Kufa kulinuku! Kufa akubiki nakutawufika. Kufa kungumhlwitsi. Ngibonga kakhulu kusukuma phasi nitewungatisa. Kumele sente konkhe njengelisiko letfu njengobe kulahlekelwe lilunga letfu Magumeni.'

'Wahamba Tsabetse esikhatsini lesimatima lapho silindzele imiphumela yelukhetfo kusasa,' kusho Shongwe.

'Pho singatsini Mntimandze? Kufa akukhetsi sikhatsi. Kufa akukhetsi ndzawo. Kufa akukhetsi muntfu. Kufika nijabulile kuletse lusizi. Kufike nelusizi kulwengete luphindzaphindvwe.

Kuhamba emhlabeni kwaTsabetse kwaletsa kunoma lokungapheli kuMphikeleli. Kwamangala boNyoni naShongwe kutsi ngabe kwente njani kuMphikeleli.

[Likhasi 104–106]

- 10.1 Yini leyenta Mphikeleli akhulume lamavi: '... kucitseke gula linemasi?' (2)
- 10.2 Ngaphandle kwemiphumela yelukhetfo, Mphikeleli kukhona lokunye lokukhulu lakuzuza emphilweni yakhe ngasesiphetfweni salenoveli lebekumchubekisela embili, ngabe yini loko? (2)
- 10.3 Yini imbangela yekutsi Khulumile atsi Mphikeleli akeme sibindzi? Chaza. (2)
- 10.4 Babhali bemanoveli bavamise kusebentisa emasu lahlukene kuveta kumbe kwetfula balingisi babo. Wena ucabanga kutsi nguliphi lisu lelisetjentiswe ngumbhali kusivetela Mphikeleli bunjalo bakhe? Sekela ngalokwenteka enovelini. (2)

- 10.5 Sifundvo sini lesitfolwa tetsamelilwati ekupheleni kwemphilo yaSikhulu Tsabetse kulenoveli. Sekela imphendvulo yakho. (2)
- 10.6 Ucabanga kutsi lethekesthi lengenhla yakha sphi sigaba sesakhiwo senoveli? Chaza. (2)
- 10.7 Humusha lesitatimende lesitsi: 'Luhambo lolumphatsela injabulo nelusizi, ubhekise etigabeni temphilo yaMphikeleli kuyo yonkhe lenoveli.' (2)
- 10.8 Phawula ngemaphuzu lamabili ngekufanana nobe kwehluka kwesimonhlalo setepolitiki salenoveli nalesi lesiphila kuso lapha eNingizimu Afrika. (2)
- 10.9 Hlatiya lenkholelo yaKhulumile ngalamavi latsi: 'Luhambo belugunyatwe nguNkulunkulu lolo babe.' (2)
- 10.10 Catsanisa imiphumela yelukhetfo lwabososifundzave kulenoveli nalenkhulumo letsi: 'Kukhetfwa umuntfu lonetimpawu tebhohli.' (2)
- 10.11 Babangelwa yini boShongwe naNyoni kutsi babikele Mphikeleli ngekushona kwaTsabetse? (2)
- 10.12 Ucabanga kutsi kufa kwaTsabetse ngabe kwamphatsa njani Mphikeleli? Beka umbono wakho. (3)

[25]**SAMBA SESIGABA B: 25**

SIGABA C: UMDLALO

Kulesigaba kunemidlalo lemibili. Wena-ke khetsa ube MUNYE lowufundze eklasini lonyaka uphendvule ngawo.

CAPHELA: Khetsa emkhatsini WENDZABAMBHALO NEMIBUTO LEMIFISHA kulowo nalowo mdlalo lowufundzile. Kumele uphendvule nobe ngumuphi umbuto ube MUNYE *ngalowo mdlalo*. Uma ukhetse kuphendvula umbuto wenzabambhalo enovelini, uphokelelekile kutsi kulesigaba uphendvule imibuto lemifisha. Uma ukhetse kuphendvula imibuto lemifisha enovelini, uphokelelekile kutsi kulesigaba uphendvule umbuto wenzabambhalo.

UMBUTO 11: UMBUTO LOYINDZABAMBHALO**KWAHLWA EMINI – JJ Thwala**

Bhala indzabambhalo lapho ucatsanisa khona indlela yekulawula sive ngekwwebukhosi nekulawula sive ngekwentsandvo yelinyenti ubhekise ekubuseni kwaMkhalelwa eLusizini nasekubuseni kwentsandvo yelinyenti eNingizimu Afrika. Indzabambhalo yakho ayesekelwe ngekucaphuna emdlalweni nalokwenteka entsandvweni yelinyenti.

Indzabambhalo yakho ayibe ngemagama langabi ngaphasi kwala-340 kodvwa angabi ngetulu kwala-390.

[25]**NOBE****UMBUTO 12: IMIBUTO LEMIFISHA****KWAHLWA EMINI – JJ Thwala**

Fundza lethekesthi lelandzelako bese uphendvula imibuto letawulandzela.

Makhosi:	Utsi sente njani mngani ngaloku? Ngiphake Emahloko hloko ngikhale ngemuke nabo? (Batsite basakhuluma, kwangena Ngedze.)
Ngedze:	Sanibonani elawini.
Makhosi/Sifiso:	Yebo Ntungwa lelihle.
Ngedze:	Kahleni bafana! Kahleni bafana! Uyihlo akamange alibuse ngengati lelive nifuna kwentani? Anati yini kutsi inhlwa ayibanjwa inhloko isavela? Yehlisani imimoya. Kadze tagcina kuba khona timphi kulenzawo. Kwagcina ngeNdlavela nayishwabadzela Besutfu.
Makhosi:	Sinike seluleko sakho Ntungwa lelihle. Tindhloko timile nyalo. Emalanga emkhosi lomkhulu ayasondzela. Simo siya ngekushuba. Esikhundleni sekutsi kukhanye embili, kuyahlwa. Sisite usikhiphe kulomnyama lesikuwo Mntungwa.

Ngedze:	Nemntfwana lomncane uyakubona lokwentekako nyalo. Imihlangano yaboNkhanise naNdzabeni ngeke iletse kuthula. Inkhosi seyite emandla ekumelana nesimo lesifana nalesi. Nayingeva, kunekutsi iphendvule ingemelwa yinhlitiyo ilale umlalela wafutsi.
Makhosi:	Siphe likhambi mbongi yesive.
Ngedze:	Likhambi kuthula, uvule tindlebe, uhlahle emehlo.
Sifiso:	Kuthula sigoce tandla kutawuba yintfo yekugcina leyo. Nasingagadli kucala batawugadla kucala. Umuntfu uphila kanye kulomhlaba. Imphilo ibaluleke kakhulu. Asigadle!
Makhosi:	(Ahlabela) Asiyiphake siyikhombe, Asiyiphake siyikhombe, Asiyikhombe ibhubhise, Asiyikhombe ibhubhise, Asiyikhombe ibhubhise, Kufa kubafanele, Kufa kubafanele.

[Likhasi 24–25]

- 12.1 Indlela Ngedze labingelela ngayo boMakhosi naSifiso kuletheksthi lengenhla ngabe iveta sphi sibekandzaba? Bhala timbili tinhlobo tesibekandzaba letivelako. (2)
- 12.2 Ludvweshu kulomdlalo ngabe lusitfutukisa ngayiphi indlela sakhiwo salomdlalo? Chaza. (2)
- 12.3 Ngekwakho kubona ngabe ngubani umdlali longumlamuli kulomdlalo? Sekela imphendvulo yakho ngekubhekisa emdlalweni. (2)
- 12.4 Lelihubo lelihaywa nguMakhosi kuletheksthi lengenhla ngabe likhombisa kutsi uhambisana nembono wamuphi umdlali kulaba lakhulumisana nabo. Sekela imphendvulo yakho. (2)
- 12.5 Kube Nkhanise wanaka tinkhulumo taNtfwasahlobo nakacoca nenina ngabe wasemukela lesimo sekunganikwa bukhosi. Humusha lombono. (2)
- 12.6 Bhala sigameko lesaba yinhloso yekutsi Makhosi aphumele ngaphandle kute tisa takhe tikhone kumbulala, usho nekutsi ngabe saba yimphumelelo yini leso sigameko. (2)
- 12.7 Kulomdlalo banyenti bantfu labebatsembele emadlotini ngalomcimbi wekubekwa kwaMakhosi, kufaka Makhosi imbala. Ngekwakho kubona galelo lini lelentiwa ngulamadloti kulesiphetfo salomdlalo? Humusha. (2)
- 12.8 NgeSiswati kutsiwa, 'Siphundvu kawuboni.' Humusha lesaga ubhekise kulamavi aMakhosi, lawabhekise kuNgedze lapha ngenhla, latsi, 'Sinike seluleko sakho Ntungwa lelihle. Siphe likhambi mbongi yesive.' (2)

- 12.9 Chaza lini lelibanjwe boSifiso naSicongo kulomdlalo? Sekela imphendvulo yakho ubhekise emdlalweni wonkhe. (2)
- 12.10 Ngekwakho kubona ngabe bangiswako walomdlalo wetfuleke ngalokufanele yini kulomdlalo? Hluta. (2)
- 12.11 Sibaluleke ngani sento saMkhalelwa sekungabeki Nkhanise kutsi abe yinkhosi ekutfufukiseni lomdlalo ute uyewufika esiphetfweni? Hlatiya. (2)
- 12.12 Ngabe Makhosi wagcina abekiwe yini esihlalweni sebukhosi njengesifiso seyise njengobe uMgcibelo wabe sewubekelwa umngcwabo? Beka umbono wakho (3)
[25]

NOBE**UMBUTO 13: UMBUTO LOYINDZABAMBHALO****UMVUZO – NS Nzima**

Esikolweni saseMkhuphukantsaba bekusetjentiswa tindlela letinhle tekufundzisa bafundzi bakhona kute baphile kahle emmangweni nasebacedze sikolo. Khetsa timbili tindlela ubhale ngato indzabambhalo lapho uchaza khona kutsi tinhle ngani letindlela lotikhetsile nekutsi titabasita ngayiphi indlela bafundzi emmangweni. Indzabambhalo yakho ayesekelwe ngekucaphuna emdlalweni.

Indzabambhalo ayibe nemagama langabi ngaphasi kwala-340 kodvwa angabi ngetulu kwala-390.

[25]**NOBE****UMBUTO 14: IMIBUTO LEMIFISHA****UMVUZO – NS Nzima**

Fundza lethekesthi lelandzelako bese uphendvula imibuto letawulandzela.

Satile: (*Ngekucasuka*) Bamba lewute ngayo Batjele! Hamba uyewutjela labanye hhayi mine!

Batjele: Angeke ngiyewutjela labanye, kepha ngitawutjela wena njengemngani wami. Siyati kutsi sewuyoma, nekutsi koma ukucedza ngetinyembeti tendlovukati. Siyati kutsi sewusitofu lesinashimela ngekuphafuta intfutfu. Siyati kutsi sewugamancele nasemutsini wetindzala. Siyati kutsi emalangeneni layinkhomba elisontfo, luhlangotsi ulubeka katsatfu nobe kane ekhaya. Konkhe loko akungiphatsi kahle mine njengemngani wakho.

Satile: Hlukana netindzaba tami Batjele! Wase wangiva ngicevuta takho kusukela sisesemabangeni laphasi?

Batjele: Siyati kutsi sewugucuke sahhukulu ngekutsandza bumnyama bebusuku. Kuyekele konkhe ngobe kunemphumela lomubi. Ngikubone kukuhle kutsi ngingakuhlebi futsi ngingakunyembenyi enkhwace kepha ngikutjele sisobabili. Loko lokwentako akuhlazisi wena kuphela, kepha kuhlazisa bangani, bomakhelwane, tihlobo, sikolo, ummango, nesive lucobo lwaso. Tento letimbi tinemphumela lomubi Satile. Hlukana nato Mntolo lomuhle.

Satile: Make akakusho konkhe loku lewukusho kimi. Yekela umsebenti webatali bami ngobe awusuye lomunye wabo.

Batjele: Abakhulumi loku kuwe ngobe abakwati kusengakafinyeleli etindlebeni tabo nasemehlweni abo. Ngati kahle kutsi babe wakho angakubulala nya nangabe angatati letindlela takho letigwegwile.

Satile: Utihluphelani ngami kangaka? Imphilo yami neyakho yafinyelela kadzeni emphambanandlela. Uma ngiyinyakakatfo wena uyiningizimu. Ngiyekele-ke Ningizimundzini ngitinyakatele ngedvwana ngicondze eNyakatfo nawe utihusheshe wedvwana ucondze eNingizimu.

[Likhasi 110–111]

- 14.1 Emavi aSatile amveta angumtali lonjani LaNgwenya? Usho ngani? (2)
- 14.2 Kuletheksthi lengenhla caphuna imisho lemibili lekhombisa kutsi umbhali walomdlalo usebentise lulwimi lolunongiwe futsi lolushubile. (2)
- 14.3 Lamavi aSatile ekutsi yena naBatjele bayinyakatfo neningizimu, afakazeleka njani esiphetfweni salomdlalo? Hlatiya. (2)
- 14.4 Hlobo luni lweludvweshu lolu lolutfolakala kuletheksthi lengenhla? Sekela imphendvulo yakho. (2)
- 14.5 Ngabe loku lokwentiwa nguSatile kuyintfo lekholwekako yini emimangweni lesiphila kuyo? Sekela imphendvulo yakho. (2)
- 14.6 Uphumelele kanganani umbhali walomdlalo kusibhalela setfulo sawo? Hlatiya. (2)
- 14.7 Bhala emaphuzu lamabilii ngesibekandzaba semoya walomdlalo lekumele tetsamelilwati tawo tiwuphile etimphileni tawo. Imphendvulo yakho yesekele ngekucaphuna tigateko emdlalweni. (2)
- 14.8 Tindlelanchubo telwati lwenzabuko tetfulwe ngayiphi indlela kulomdlalo, Umvuzo? Chaza ubhekise emdlalweni. (2)
- 14.9 Bakhona labatsi lomdlalo ubhalelwe kufundvwa kuphela, hhayi kudlalwa esiteji. Beka wakho umbono ngaloko. (2)

- 14.10 Batjele ungubangiswako mbamba (umdlali lomcoka) kulomdlalo. Sekela lombono ngekucaphuna emdlalweni. (2)
- 14.11 Hlatiya kubumbana kwemlayeto walomdlalo kanye nengcikitsi yawo. (2)
- 14.12 Phawula ngemasu lamatsatfu lasetjentiswe ngumbhali walomdlalo ekwetfuleni balingisi bakhe. (3)
[25]

SAMBA SESIGABA C: 25
SAMBA SAKO KONKHE: 80